

অঁডরা



পরদিপ কুমার মাহাত

অঁজরা

(কুড়মালি কলিহালা, গিত, ঝুমইর)

পরদিপ কুমার মাহাত (ডুমরিআর)

অঁজরা
ANJRA
(Kudmali poem)
By
PRADIP KUMAR MAHATO

- 1st Publication -30 September, 2023
- Copyright - Author
- Cover - Rakhahari Mahato (Dumriyar)
- ISBN - 978-93-5980-689-1
- Printed by - Sarada Press, Hetjari, Purulia
- **Published by**
Pradip Kumar Mahato
[Village- Jhalmamra, Post- Chapaitard,
P.S.- joypur, Dist - Purulia (W.B.)]
- Book Designed by Manohar Mahato
- Price – 60/- (Sixty rupees only)

পাড়অন

আদি কাললে মানুস জখন কাথা বারতাক মইখে মনেক ভাভ
পরকাস করে পারলা নিজরাক মইখে সভে বুঝে পারলা তখন অখরা হিঁআ
হুঁআ ছিতরল সভেকাই একে গঠে হেই বসাগত করে লাগলা। এহে নিঅর
অসতে অসতে সইভতাক অণ্ডবাটেক ডহরে অণ্ডআই আউএ লাগলা।
অসতে অসতে বুইধ ভসসা বাঢ়েইত বাঢ়েইত পরব তিহারে মনেক রিঝে
খেতে, গঠে, টাঁইড়ে, টিকরে এক দুই কলি সুরে, তালে মনেক ভাভ হুঁদ
আকারে গাহে লাগলা। তাবাদে আরঅ টুএক বুইধ বাঢ়লে গিত ঝুমইরেক
কলি বাঢ়ে লাগলেইকা। উ খনে জাখরা বাচিক হুঁনদে গিত ঝুমইর জড়িকে
মনেক ভাভ ফেরিছ করেতেলা তাখরাক কনহঅ নাম ঠেকান নি
রহেতেলেইন। কাহেনঅ কনহঅ লগে আপন সঁচল কাথাটা কহেতেলাক,
উ কাথাটা দসর এক লকেক মু লে ই মুহে উ মুহে ই ঠঁঠলে উ ঠঁঠে হেই
ঘুরি বুলেতেলেইক। মনেক ভাভকে জদি একটা সুরে, তালে, হুঁনদে
ফেরিছ করল জাইক তাহেলে মানুসেক মইখে রিঝ রুঁগেক ফুরতিটা বাঢ়ি
জাইক। এহে নিঅর হেইত হেইত হালুক জুগেউ হালুক কবিতকাররা
আপন মনেক ভাভ গিত ঝুমইর ফেইর কবিতা লিখি মনেক ভাভ ফেরিছ
করহত। এহে নিঅর গিত ঝুমইর ফেইর কবিতা গিলিন হেলেইক
কুড়মালি সাহিত। সাহিত হেলেইক মনেক ভাভ, পিআস আর এহে
মনেক ভাভ আর পিআসকে সাহিতে মিটাউএইক।

চিসঅইআ

পরদিপ কুমার মাহাত

ঠেহঅড় পাইত

• বাঁকরল ঘাৰ -----	07
• ভরল সরাবনে -----	08
• মাইঁভাখি কুড়মালি হামর মানভুইঁ -----	09
• ছটনগপুৰেক রূপ -----	10
• পরকিতিক মান -----	11
• জঁগল মহলেক মাটি -----	12
• বেটিআ জনম -----	13
• নারি -----	14
• মঁই সুরধনি মাহাত -----	15
• ধান রপা -----	19
• বরিসাক রাতি -----	20
• কাঁসাই লদি -----	21
• সারহুল -----	22
• মহুল ফুলা -----	23
• মাড়লি -----	24
• ঢেবচু পাইখ -----	25
• বড় গাছ -----	26
• তাল চঁটি -----	27
• সারই গাছ -----	28
• পান ভঁমরা -----	29
• নেউতা -----	30

ঠেহঅড় পাইত

• ঝরল পালহা -----	32
• আগভারি -----	33
• কুড়মিক লাতাইড় -----	34
• ধান ঝাড়া -----	35
• নাউআ বেৰা -----	36
• সিআৰ -----	37
• দেউতা ভুতাক দিসা -----	38
• বরিসাঁই দেলেইক দাগা -----	39
• পেছুইঁ ঘুৰা -----	40
• ঝাড়খনডেক দেউতা -----	41
• সহিদ সেউরনে -----	43
• সহিদ নিরমল মাহাত -----	44
• সহিদ রঘুনাথ মাহাত -----	45
• হে সেনানি -----	46
• মানব নি বাহারি ভাখি -----	47
• মাইঁ ভাখি -----	48
• আসে রহলঁ -----	49
• পহিল পিরিতি -----	50
• চাঁদেক লেখে -----	51
• মাইঁ ভুঁইএক তেঁহে -----	52
• সখিআ বিনে -----	53
• অজধিআ পাহাড়ে -----	54

ঠেহঅড় পাঁহিত

• কাহে এসন হেলে -----	55
• পানি জিআউ জিউ জিআউ -----	56
• বসমতি -----	57
• টুসু হামর সনাক কাঠি -----	58
• টুসু চুমান -----	59
• টুসু হামর আদরেক বেটি -----	60
• খুখড়া ডাকাই -----	61
• বার মাইসা পিরিতি -----	62
• সাত সহিদ -----	64
• সহিদেক মাটি -----	65
• উলগুলান -----	66
• হামরাক ঝাড়খন -----	67
• রিঝে রঁগে মানভুম -----	68
• করনা ভাইরাস -----	69
• জাগরন -----	70
• সাধেক জঁগল মহল -----	71
• পহিল দেখা -----	72
• সবুর নি মানে -----	73
• ছটনাগপুরেক ধিআমনি -----	74
• বুমরিআক টানে -----	75
• জনমভুমি -----	76

ঝাঁকরল ঘার

বহর দিনেক মাড় পানি,
চাস করঁ জিউ মুড় জাঁকি।
বরিসাক পানিহঁ ভিজি দেহি,
কাদা খেতে মাটি জাঁগি।
ধাঁগড়িনরা ধান রপি,
সুআগঁ খাটাই দসেক লাগি।
মেহরারু মরদনা মাটি কাটি,
ভাঁগল ঘারে দিআ জরি।
ভাদরেক ইজতিআ রাতি,
ভুলগুড়িহঁ চাঁদ বিজলি বাতি!
ইজর মনে জিবন বিতি,
গরিবেকর মনটা খাঁটি।
হারেক পাকৈঁ ঘুরি ঘুরি,
ভাভঅ মনে আইড়ে গবচি।
বিহানেক মাড় সাঁঝে নুড়ি,
ঘাম ঝরা পানি গড়ে গিরি।
চাস করঁ গিত গাহি গাহি,
তাউ হামরা কাহে হেঁঠ মুড়ি ?
ঘার ঝাঁকরি মাইঝা ভিজি,
ভিজল লুগাই রাইত বিতি।
ভিনসারিহঁ নিদাই উঠি,
গড় লাগিকে মাইঁ মাটি,
ডহরে ডহরানি কামেক লাগি,
তাহুঁ চাসারাক দাম মাটি ॥

ভরল সরাবনে

বাহারে মেঘ আনাই টাপলেক আকাস কুইচকুইচা আঁধায়ে।
সুরুজ কখনে হেরাই গেলাহেক সরাবনেক কেরিআ বাদইয়ে।
ঝিরিহিরি পানিইঁ ঝুমরিআ তালে নাচেই মনেক মেজুরি।
বিতল বেরাক সৈঁউরনেক কাথা টুঁড়হঁ হিআক আগুড় খলি।
ঘারেক বাহারে মহুল ফেড়ে মর পিআস মন আহি ডাঁঢ়াই।
মাছি আইধঁরআ হেউএহেক পাইখ পাখুড় ডহরহত খাঁধাই।
কেজান মর মনেক পরানি আউতি নঅ নিহি সাঁঝ বেরাই।
নি জানি হেরাই গেলি তারিরাক মিটমিটানি বরিসাক রাতিহঁ।
ভরা সরাবনে ভরল পানি লেই আঅহত পেনিহরেক দল।
ডভা ডাঁড়ি খেত ভরি ছপলি উঠেইক জেসন ভরল জইবন।
এসন দিনাইঁ তহর মনে পড়েই উথলি উঠেই বেআকুল মন।
কতিদিন বরিসাক পানিইঁ ভিঁজঁ নিহি ধুরে নি রহিআ এহে খন।
রসিকাক তালে তালে ঝিরিহিরি পানিইঁ ভিঁজাঅম নইঅন।
ভিজল খঁপা সভি খসেই বরিসাইঁ পিআ,
ডাঁইড় ধরি কমর হিলাই হেলি নি নাচা।
কতেক বরিসা আইল গেইল,,,,,
পিআক সঁগে আর বরিসাক পানিইঁ হেলি নি ভিঁজা।
মলকইএ আউলেক সরাবনে বরিসাক বুঁদা,
সুপলিইঁ ঢারল বরিসাক বুঁদা মেঘেক লরেঁ ছপলল ধরা।
মহুল গাছেক ডাইর পালহালে টপকেহেইক পানি।
মহলে মাতি টিপিক টিপিক গিরেহেক বরিসাক পানি।
ঠাই টাটকা ডাঁঢ়াই আই, পইতাবেহেনি তরহা!
সহে নি পারহঁ এসন বিসরলেক জালা।
মিটিক নি ফাড়ি ভালি আই ভরল সরাবনে সাঁঝেক বেরা।
সুখাইকে ধুরাক হিআ উড়েইস অনতরে।
ভিজলি নি দিঅ অঁঠ আর বরিসাক লরেঁ!

মাইঁভাখি কুড়মালি হামর মানভুইঁ

মানভুইঁএ, মাইঁএক কঁরাইঁ,
রিঝামাঠাই রহেহেল।
ভাখিক সরে, ভাখিক ছলে,
লুটি লেলে তরৈঁ তরৈঁ।
কেথিক আসে, কেথিক চাসে,
ছিনগালে করাটালৈঁ।
মাইঁএক কথিইঁ জনম লেলে,
ইঁফরি দুধা ঢকলে।
ডেনখা হেলে, উড়ি পারাইঁ গেলে,
মাইঁ কেহে সরমে লেলে।
আপন মাইঁহারিলে ভিনাই লেলে,
গড়েক ধুরা নি লেলে।
চিনহাপ রাখি পারাই গেলে,
টিঁটাটা মুদে নি পারলে।
জেতেকই ফদড়িবুলে দসর দুআরে,
পারবেহে নি মুদে টিঁটাটাকে।
মাইঁভুইঁ মানভুইঁএক জনম ভাখি,
কুড়মালি ভাখিইঁ থাখিকুটি।
ছউ ঝুমইঁরে ছিতরাই দেলেক,
দেস দুনিআক অড়েফেড়ে।
মানভুইঁ মাইঁএক কঁরাই জনম হামর,
কুড়মালি ভাখি হেকি হামর।
কুড়মালি মাইঁএক গড়েক তরৈঁ,
রহব মইঁ জনম ভরি।
জই জই গিত গাউহা আউআ সভে,
কুড়মালি ভাখিক তেঁহে॥

ছটনগপুৰেক ৰূপ

ছটনাগপুৰেক ভুইঁএ মইঁ, থানাইলাহ বসমতিক কতেক ৰূপ,
টুটি কাঁহু খাঁজি পাউবে নি, এসন মাইঁএক সনাক গঢ়ল ৰূপ।
ৰিঝে ৰংগে ঝুমইৰ গিতে, বার মাসে তেৰ পরবেক কতেক হুবা।

ইজতিআ ৰাতিহঁ সারই পলাসেক ফাঁকে, ঝকঝকাইক আলা,
আঁধরি ৰাতিহঁ ঝুনপুকিরা ঝলকত, জেসন আকাসেক তারা।
সনাক ভুইঁএ পাহাড় কঁরে, সুরুজ উগেই, বসমতি করেই আলা।

ভিনসারিহঁ পাইখরা জাগত, আপন কামে ডহরত চাসানিখা।
বন পাহাড়ে গাজাড়ে ভরল, বাঁকা ঢেকাঞ আহেক লদি লালা।
সনাক ভুঞে সনা ফরেইক, সাইবতে আহেইক জেসন সবননখা।

পরকিতিক মান

জাখরা বুঝত নি পরকিতিক দান,
তাখরা কিনা বুঝত, একটি গাছ একটি পান।
জাখরা রপত নি, করত ঢাহান,
তাখরা কিনা বুঝত, একটি গাছ একটি পান।
জাখরা করত নি, পরকিতিক আরাধন,
তাখরা কিনা বুঝত একটি গাছ একটি পান।
জাখরা মানত নি হিত মিতান,
তাখরা কিনা বুঝত একটি গাছ একটি পান।
জাখরা লুটি বুলত মুহেক মাস,
তাখরা কিনা বুঝত একটি গাছ একটি পান।
জাখরা করত নি আদর জতন,
তাখরা কিনা বুঝত একটি গাছ একটি পান।
জাখরাক নি কনহঅ মান অপমান,
তাখরা কিনা বুঝত একটি গাছ একটি পান।
জাখরা গাহত হডেক জাগরন,
তাখরা কিনা বুঝত একটি গাছ একটি পান।
পরকিতিক দান সবলে বড় দান,
অখরা রাখে নি পারতা, পরকিতিক মান?

জঁগল মহলেক মাটি

কুড়মালি মাইঁ মাটি,
জঁগল মহলেকর মাটি।
সনাক লেখে, হেকেক ঢেইর খাঁটি,
খাঁটি গউ, ছটনাগপুর কতেক সুথর হেকি।
খাঁটি গউ, ছটনাগপুর রিঝেকেরি খনি।

কাঁসাই লদি, সিলাই লদি,
বাঁকা ঢেঁকা কুবাই লদি।
দেখা সবননখাই আহেক সনা চাঁদি,
চাঁদি গউ, ছটনাগপুর কতেক সুথর হেকি

সাল মছল সারি সারি,
পাহাড়ে গাজাড়ে ভরি।
নিরন মাসে পলাস ফুলাইঁ ভরি,
ভরি গউ, ছটনাগপুর কতেক সুথর হেকি।

বাইদ বইহার কানালি,
খেতে গঠে কাম কেরি।
দেখা পহিল হামরা গাড রইহ খেতি,
খেতি গউ, ছটনাগপুর কতেক সুথর হেকি।

ঝুমেইর হাঁকি, গিত গাহি,
রিঝে রঁগে মাতি রহি।
হামরা ডাঁইড় ধরি নাচই পাঁতা সারি,
সারি গউ, ছটনাগপুর কতেক সুথর হেকি।

বেটিআ জনম

মাইঁএক কঁথিই জনম, মাইঁএক কাঁখে
দুলারি ধিআমনিরা ছুটলে ডাঁগর হেই,
বিহাক লাইগ হেউঅত।
বেহাক বাঁধনে বাঁধাত চাইর চিরককালেক কাথা,
বিধাতাক লিখল ভাইগকে আপন করি সসুর ঘারে ডহরানিক ডহর।
বাপ মাইঁএক দুলারি ধিআমনিরা,
আজা পুরখা ডাক পুরুসেক কাথাই,
তিন নিসটা কাথা জনম, মরন, বেহাকে মানাই,
ভাই ভেইআদ কুটুম ছাড়ি, সসুরেক ডিঁডিআইঁ।
মেহেরারুক কপালে লিখল বিধিক বিধানে,
নারিক জনম বিধি কাহে পরেক দুআরোঁ ?
এসন কাঁছ কিনা লিখল আহেইক বিধিক পাতেঁ,
ঘার আলা কেরি বেটিআ জনম লেলে,
ডিঁডিআ সুইন কেরি সসুর ঘারেক আলা করেঁ ?
অঁজরা ভরাই রাখলে বাপেক ঘারে,
সেহ অঁজরা লেইগেলে,
বেটি ছুউআক মিছাই জনম, পরেক ঘারে বিতাউলে,
বাপ মাইঁকে বিসরি কাহে জনম লেখে চলি গেলে !

নারি

বসমতিক করাই জনম মরন,
বসমতিক করাই জে জিঅঁন,
নারিক কখিই জনম জে তর।
নারিরাই করন লালন পালন,
নারিরাকে বাসিআন নি, আপন!

বাপেক ঘার আলা করি, রাখত ধিআমনি,
সঁইআক ডিঁড়াক ভাঁড়ার ভরি, জগাত তিরিআ।
নারিক লেখে আপন নিহি, টুঁঢ়া দুনিআদারি।
বাপহারি মাইঁহারি, আপন ডিঁড়িআ ছাড়ি,
পরকে আপন করে, জানত দুনিআক নারি।

নারিরা জগাত ঘার কননা,
নারিরা জগাত মান সনমান।
দুনিআক আহেক জতেক দান,
নারি আর পরুস সমান সমান।
পরুস অধিন নি করা মুসিআন।

মই সুরধনি মাহাত

মই বেটি, মই সুরধনি,
মকে খেতে গঠে ডহরে টাইড়ে টিকরে,
বাজারে গাজাড়ে আঁদাড়ে পিঁদাড়ে, বাদাড়ে,
জাঁহাই থানাউবেহে, মকে পাউবেহে।
জাকর গাথে সাটি, আঁচরে আঁচর খাটি, বাঁইএ বাজুবাই,
খঁপাইঁ কমল কাঁটা, ঘেঁচাইঁ হেঁসলি, নাখে নথনি, চইখে কাজর,
হাঁথে বাজু, আঁগুরে চুটকি, কানে মাকড়ি, গড়ে গড়মল, সুপলিহঁ আলতা।

জাকর রেগে জাউআ, করম, টুসু, বিহা গিত,
ঝুমইরেক সুর ঝারেইক, জিতিআ জিহুড় পালেই,
আর জেঞ আগদহলি হেইকে আখড়ায়,
ডাঁইড় ধরি পাতাসারি নাচেই, মই বেটি!
মই আগদহলি ঝুমরিআ "সুরধনি মাহাত"।

মই ছটনাগপুরেক অজ গাঁউএক চাসাক বেটি,
জন গাঁউ মুলুকেক সৈঁস সিআঁড়ে,
আর তহরা অজ গাঁউ কহি জানহিআ।
হামরাখ এহে অজ ছটনাগপুরেক ভুইঁএই,
পহিল চাস বাসেক উচরন হেরইহেক।

আর এহে চাস বাস কিসি সইভতাক,
পহিল আউড়াএক সৈঁউরনে জাউআ পরবা।
তেইঁ হামরা, জতেক গাউএক সঁজতিরা,
করম ডাইর গাড়ি, নাচিএ গিত গাইহ,
"জাঁহু জাঁহু করাম রাজা, জাঁহু ছউ মাস।
পড়ত ভাদর মাস, আনবঅ ঘুরাই"।
হামি এহে করামেক বেটি লাগিঅ।

এহে ভুঁইএক অড়মুড়া বন পাহাড় লদি লালা,
বনে গাজাড়ে ভরি হেরিহর হেই আহেক।
রুখা পাথইরা মাটিটাইঁ জেঁদে থানাউবেহে,
সারই, পলাস, পিআল, কেঁদ, আমা, জামা, তেঁতইর, কইর,
কসুম, মছল, জইড়, বড়, ভেলুআ, ডেলাই
চাইর বাটে ভরল আহেইক।
এহে পরকিতিকরে, হামি বেটি লাগিঅ।

কাঁসাই, সিলাই, সবননখা, গুতাই, দামুদর, ডুলুঁগাঁ, হিজরি, কুবাই,
রাঢ়ুআই, বইতরনি বহই পানি নিরাধার।
এহে পানিক সঁতেই পহিল ডেরা গাড়া,
বইসকতারা এহে মাটিকর আদিবাসি।
তেইঁ সভে কহত, "জেঁদে জেঁদে পানিক সঁত,
সেঁদে সেঁদে কুড়মিক জঁত"।
হামি এহে লতে লতেক বেটি লাগিঅ।

হামি অহে বেটি লাগিঅ, বসমতিক করাঞ জনম,
জে বসমতিকে তহরা মাই কহি জানহিআ।
মেনেক অহ মাইএক মান নি রাখে পরিহা,
মুহে ফদড়ি বুলিহা, "তিরিআ পুরুস সমান সমান"।
আর মেহেরারুক মান রাখিআ হেঁইড়সারে।
হামি এহে হেঁইড়সারেক বেটি লাগিঅ।

তহরা বর সাজি, হাঁথি ঘড়া বাজ বাজনা বরাইত,
লেইকে কেনিআইএক ঘার ঢিঢ়া জাইহা।
মাঞেক আঁচর সুইন কেরি কাঁদাই আইহা,
আর বানার দিহা, “বেটি জনম মিছাই ভালা,
পরেক ঘার আলা কেরা।”
হামি জে ঘার আলা বেটি, লাগিঅ।

জন মাইএক কাঁখে কঁরাঞ করি মানুস হেলে,
মাইএক কঁথিহঁ জনম হেই দুধা ঢকলে।
অহ মাইএক জাইত মেহেরারুরাকে,
তহরা ডহরেক ধারিঁই বইসাই দিহান,
ডহরে দেখে পাউলে লিলকাহান।
হামি ডহর ধারেক বেটি লাগিঅ।

মুড়েক ঘাম গড়ে গিরাই, লিখা পঢ়া সিখা,
জাকর সুআঁগ খাটাই সঁগসার বাঁচেক,
ভাই দাদাক বিমারেক দাউআই কিনাইক।
জাকর ছতিআক তঁরে, জিউ বাঁচেক,
অহে পরবতিক তরে সুখে ঘার কেরা।
হামি সুখ সারি ঘারেক বেটি লাগিঅ।

এসে বসমতিক সিরজন, বসমতিক গঢ়ল।
বন পাহাড়েক গাছ পালহা উভড়াই দেলাহাক।
পরকিতেকে তহরা মাই কহি মানলাহাক,
মেনেক মাইএক লুইহে চুসি সিরাই দেলাহাক।
আইগ লাগাই ঢাহান করি দেলাহাক,
তহরা মাহামাইএক গাছ ফেড়ে, গড় লাগেইহা।
হামি মাহামাই, হামি বেটি লাগিঅ।

একদিনা, তহরা জাখরাকে মাহামাই কহি জানহিআ,
জানবুইঝকেউ মেহেরারুক মান, রাখে নি পারহিআ,
একদিন এহে মেহেরারুক, পরকিতি মাইঁ সুরজেক আইগেক
লেখেনজরিকে, পিরথিমিক মানুস বরন জিবকে,
ভাঁড়ার কনাতে জেসন বাঘুত কুদরা ধুঁদ বাসাত লেই আনেন,
কেরিআ মেঘে ঘেরিকে বিজলি আর ঠেঠ ঠেরানিইঁ কাঁপে রহেক,
অহে লেখেন ভেসে হামি একদিন, আইগ হেইকে মলকি আঅব,
উদিন তহরাকে কেঁহু, এসন কিনা দেউতারাউ বাঁচাউএলাই নি পারতহন।
বসমতি ঘুরিকে আপন রূপে সাজতি,
হামি বেটি বসমতিক রূপ,
আর অহদিন তহরা আর সাজলনতঅ রূপ থানাই

ধান রপা

আসমানে গরজেই মেগা, গাদি বরিসা।
কাদা খেতে ধান রপা, ঘঁষে দেহি ঢাঁকা।
ছপলি পানি উছলা,
হেলেক নি রপা,
আইড়ে বসি আহঅ, সাঁঝেকর বেরা।

একেটা ছুটু খেতে রপইতে আড় বেরা,
চাইরঅ বাটে আইড় ভাঁগি হেলেক টাটা।
উ বাটে মেঘে ঢাঁকলা,
হেলেক আঁধরিআ।
আইড়ে বসি ভাভঅ, হেলি কতেক বেরা।

ঝুমইর হাঁকি কনে আউএই ই বেরা,
থানাউ লিঅন হেকত গউ অখরা।
দেখিকে জুড়াই হিআ,
অগউ লেইএ চালা,
বেরা ডুবি গেইল, চাঁড়ে ডিঁড়িআ চালা।

বরিসাক রাতি

ঝিৰিহিৰি পানি বৰসেই গটে রাতি,
পৰান সখা বঁধু কাঁহা রহলা গতি।
নিদ নেহি দিঅ আঁখি,
দুআইৰ রাখলাহ খলি।
আসমানে চমকই বিজলি,
অগউ হামৰ হিআক পৰানি।

থানাই জে নি পাতাইহঅ রাতিও,
বাহাৰে ঘুইচ ঘুইচা আঁধৰি,
আসমানে মেঘা গৰজি,
ধূৰ কাঁহ জাই নিহি!
আউএইস ডহৰে ডহৰি,
অগউ হামৰ হিআক পৰানি॥

কাঁসাই লদি

জাবড় পাহাড়ে অড় হেই
পুরুব বাটে বহেই গড়গড়াই,
সেহ লদি হেকেক জে কাঁসাই।
পাথইরা চাটানি মাটি,
বহই লদি হবকি ডবকি,
বান আউলে ফুঁফআনি,
হেলে বরিসাই গাদি পানি,
তাঁহ্ চাসাক জিঅন কাঠি।

সাহারঝরা বাঁদু কুমারি,
আর ভইরব বাঁকি,
এখরানি আইকে মিসি,
হেলা জে একে গুসটি।
পানেক লদিঞ টুসু মেলাই,
আঅত মকর সিনাই,
জাউআ পরবে বেটি ছউআরা,
জাউআ পাতত বালি ভিজাই।

সারহুল

ফুটলঅ সারইআ ফুল, পঁহচলঅ সারহুল,
মহুআ মাসে।
হামে নাচবঅ সারহুল গউ,
বেড়ি রিঝে।

সারই মহুল পারাস ফুলা, মহকে বনফুলা,
বাসে বাসে।
ভমরা লুটেই হে মধুআ গউ,
ফুলাক বাসে।

পাহাড়ে গাজাড়ে বনে, কুইলি কুহন কুহকে,
গাছেক ডাইরে।
পরদিপ ভনেই হে ঝুমইরে গউ,
সারই বনে॥

মহল ফুলা

মহকউআ মঘু মাসে, গঠে বন ভরলঅ বাসে,
মহল ফুলাইঁ গাছে গাছে, ভালা সভি গটি বনো।
গুনগুনিআ ভঁমরাক আনাগনা কুমরিআ সুরে,
উথলি পারান কুইলি কুহ্নেক কুঁহকানিক হাঁকে।
গাছ ফেড়ে গবচি ভালঅ মহল টপকেক আসে,
অনা দনা মহল টপকা ছিতরলা জে গটে ভুঁইএ।
হিআ হামর কতি আসে, নি জান বিসরলা কাহে!
খঁচে মহল চিনহাই জেসে, ডেটি গুনাই ভরল রসে,
পান ভমরা হিআক মাঝে, মনউআ রহলি আসে।

মাড়লি

সুরুজ উগেক অগুই,
করিঅন গউ বরন।
পিরথিমি আলা কেরি,
উগেই সুরুজ মাহারাই॥
ফুলঝইর বিহানে হামরা,
করিঅউ হুঁচ গবর,
ঘার দুআরে মাড়লি দিঅ
সুরুজ ছাপ নিঅর,
পুরুব বাটে মু কেরি হামরা,
গড়লাগ ভুত পিঁঢ়াক॥

ঢেবচু পাইখ

ঢেবচু পাইখ, ঢেবচু পাইখ,
তঁই ফিড়িগঁ ফাড়াগঁ উড়িস।
টাঁইড়ে টিকরে খেতে গঠে,
ইঁহা উঁহা ফড়িগঁ ধরি বুলিস।
কাড়া গরুক পিঠে লধকি,
তঁই খাউএক টউআ করিস।
বনিক সঁগে খাইএক লাগি,
তহরা লিআই ঝগড় করিস।
বনিক ঠিনলে মুহেক মাসটা,
লুটি লেইকে তঞ টঁটা ভরিস।
ডেনখা ফাড়িকে নাচি কুদি,
আফর খেতে উড়ি বুলিস।

বড় গাছ

হে, বড় গাছ, তুঁই আহিস হাজার বছর দাঁড়াই,
রউদ বাসাত পানিহঁ, সিধা তহঁ রহিস ডাঁড়াই।
নিরন ধরন, বরিসাক দিনাইঁ রহত তর তঁরাই।
কতেক পাইখ, তহর ডাইরে রহত খাঁধা বেনাই,
তহর জঁটা গিলিন, ছিতরল রহেক গড় তঁরাই,
বিনা ফেড়েউ জঁটাক ভরে, রহিস বছর বিতাই।
কতেক জিউকে, আপন কেরি রাখিস অগরাই।
পাত লেই খেলত ছউ নাচ, আর খুখড়া লড়াই।
তহর ফরেক সুআদ পাইকে আঅত খাইলাই,
কাউআ বনি মইনঅ সুগা, সিআর রাইত চরাইঁ।
তুঁই হেকিস বন মাহান, জিউ বাঁচত তর কঁরাইঁ॥

তাল চঁটি

তাল চঁটি, তাল চঁটি,
তাল গাছাক টুইঁএ, খাঁধা কেরি।
তাল পাত চঁরি চঁরি,
এক কঠা দুই কঠা, খাঁধা করি,
কতেক তর আরিকুরি।
মাঝ খাঁধাই রহিস আলা কেরি,
আঁধারে বুনপুকি জরি।
ধুঁধ বাসাত আর বরিসাক পানি,
রহিস ডিঁড়াই আরাম করি।
জেসন রহত মুলুকেক রাজা রানি॥

সারই গাছ

সারই গাছ সারই গাছ,
সইর খইললা বাঢ়িস।
সইর খইললা মন তর,
আদি দেউতা লাগিস।

গাঁউ দেউতা থানে থানে,
তঁহি আহিস সভে খনে।
আসিস মাগ তর গড়ে,
বর দিহা হিআ খুলাসে।

ধুপ ধুনাই দাতইন কাঠি,
পালহা পাতে দনা পতরি।
ভগতা ঘুরাই লাগেক খুঁটি,
সারই গাছ হেকেক খাঁটি।

বছর উচরেক মধু মাসে,
সারই ফুলাক মধু বাসে।
সুরে সুরে সারহুল পরবে,
সুখ সারি ঘারে বাহারে॥

চতুর্দশপদী কবিতা (সনেট)

পান ভঁমরা

বনে কতি বরন ফুলা, ফুটি গেইল,
বাসে বাসে বনআ গটে, ভরি গেইল।
কন ফুলাঁই জে, ভঁমরা বসি গেইল,
ভঁমরা মকে আড়ে ভালি, চলি গেইল।
কাঁটি জে লেইল, ভঁমরা আই গেইল,
পিআ হামর, কতেক আইল গেইল।
দসর ফুলাঁই ভঁমরা, মজি গেইল,
ভঁমরা আইজ, ভুলিকে চলি গেইল!

লউতন পিরিতে বঁধু, মজি গেইল,
পুননা পিরিত ছাড়ি, পারাই গেইল।
কাঁটি ফুটি ফুলা, গটে থিরাই গেইল,
মধুআ লুটিকে ভঁমরা, চলি গেইল।
ভঁমরা কাহে তঁই, বিঁধি চলি গেইল?
সেল দেই ভমরা, উড়ি কাঁহা গেইল?

নেউতা

হে পৱান সখা, আউবেহে মৱ সঁগে, পাহাড় ঘেৱল উঁগৰি কৰেঁ মৱ গাঁউএ,
সাৱই পিআৱ মছলেক পাতেঁ পাতেঁ মনগুমানি বনেক ৰেঁগিআ ডহৰে,
সুখ দুখেৰ জিনগানিক জড়ল পিৱিতে,
মিটিক মিটিক বুনপুকিৱাক সভি গাছে।
ভাই ভেইআদ গাঁউআলি গঁতে গঁতে নেতে নেতে
আহাত বসাগতে ডিঁডিআই একেগঠে।
হে পৱান সখা, আউবেহে মৱ সঁগে, পাহাড় ঘেৱল উঁগৰি কৰেঁ মৱ গাঁউএ,

গাঁউএক জুড়িআ লদি বহেইক পিঁদাড়েৰ কৰেঁ,
ঝলকইআ পানিহঁ মনেক ছভি কাজইৱা আইখে,
পাখন চাটানে গবচল, থানাত্ত হাউপাৱে,
মনগুমানে ৱহঁ আনাৱ বানাৱেক আসেঁ।
বিনি সুতাক মালা গাঁথঅ এহেপাৱে অহপাৱে,
ফাঁইদ পাতি গবচি ৱহঁ দিঅ হিআক মেলনেক ফাঁদে।
হে পৱান সখা আউবেহে, এহে জুড়িআ লদিক গাঁউএ।

লাতাইড় লাগি আহেইক বনে বনে, আৱ ঘেৱল চাইৱঅ বাটে।
ধুঁধ গাজাড়েৰ বাঁকাটেঁকা ডহৰে,
পথতিআৱা ডহৱত আপন কামে।
বনেক সিতলি বাসাত আৱ ছাহিৱাইঁ জুড়াইক মনে,
হিআ ভৱি জাইক মনেক দৱদ আৱ পিআসে।
হে পৱান সখা, আউবেহে মৱ সঁগে, বন গাজাড়েৰ ডহৰেক গাঁউএ।

চারবাহাইরা গরু চরাউঅত গঠে বাটে ডুংগরিক ধাইরৈঁ ধাইরৈঁ,
বাঁসি বাজাই ঝুমরিআ সুরেক তালে তালে,
মনেক হুলাসে উদকি উঠেইক পরানো।
ঝুমইর হাঁকাই সাড়াই দেইন মজরল জইবনে,
মেঘেক আনাগনা মধুমাস আইলেক জিঅনেক দুআরৈঁ।
হে পরান সখা, আউবেহে মর সঁগে, চারবাহাইরাক গাঁউএ।

মধুমাসে মহল ফুলাইঁ বনে বনে ছিতরেইক গটে ডুঁইএ।
ভমরা মধু লুটে আউঅত ফুলে ফুলে,
মনউআ হরসে মহলেক বাসে বাসে,
কুইলি কুহনেক কুঁহকানিইঁ ফাগুআ পঁহচেই দুআরৈঁ,
বাহা সারহুলেক রাঁগল গাথে, বরনেক সারই ডহরা ঘারে ঘারে।
হে পরান সখা, আউবেহে মর সঁগে, মধু মাসে মহল বিছে মর গাঁউএ।

বার মাসে তের পরবে হুবে মাতত ঘারে বাহারে,
বাঁদনা টুসু বাহা করম পরব ঘারে ঘারে,
হুঅ নাচে নাইমজাইজকা দুনিআদারৈঁ।
চাসিরা চাস আবাদে রিঝ রঁগে মাতি বার মাসে তের পরবে।
মেহরারু মরদনাক লাচন কুদন ভাদরেক ইজতিআক রাইতে।
হে পরান সখা আউবেহে মর সঁগে ছউ ঝুমইরেক গাঁউএ।

পাহাড়েক ঝারনা পানিঁই মনেক মেজুরি নাচই হিআ মাঝো।
সুরুজ ডুবেই পাহাড় ঘেঁসে নাওআ বিহান আসেঁ,
নিদাই নিদাই আস নাউআ সপুনেক আসেঁ।
পারাসেকর মালা গাঁথি রাখলাইঁ কতি জতনে,
লিল আসমানে উগেইস বেরা রৌঁগিআ বরনে।
হে পরান সখা আউবেহে, মর সঁগে রৌঁগিআ পারাস ঘেরল গাঁউএ।

ঝরল পালহা

কতি রঁগে ভালো, মধুমাস আউলা,
পিআ হামর কাঁহা রহলি গউ ?
ধনি বিনা উদকি উঠই হিআ গউ।

নিরনে ধরনে মন বেড়ি জে উদাস,
ধিকি ধিকি জরেই পিরিতিক আইগ
জেসন পালহা ঝরল গাছ গউ।
বরিসা আউঅলে, হেরিহাউঅলে
আস জাগে মর হিআ গউ,

আগভারি

গটে পিরখিমিটা আইজ জেসন, কেথিই ভরি গেলাহেক!
চাঁদ সুরুজ গহ তারা অখরানিঅউ সহেলাই নি পারহত।
মানুস আইজ অমানুস বেসুরা হেইকে অলখঁথাহাত,
আকাসে বাসাতে চাইর বাটে মদঅ বাসে মানুস বাঁচে খজহত।
পাইখ পাখুড় জিব জনতুক দেখি মানুস নি সিখে খজত,
পরকিতিক সিরজন বন পাহাড় লদি লالا উভড়াই দেহত।
মানুসেই মানুসকে চিনহে নি পারি নিজরাই দইবি ডাকহত,
এসনে করিই বসমতাক কঁরাইঁ কাহে ঘার করি রহত।
মানুস হেইকে মানুসেক লেখেন বাঁচি রহাটাই জঁঅত,
উঠতি ডুবতি বিচার করতি মানুস জেসন একদিন বুঝে পারত।

কুড়মিক লাতাইড

কুটুম কুটমালি ভাই ভেইআদেক টান,
জিআই রাখা নাতাক মান।
কুড়মি হিত মিতানেক টান,
মাঁই ভুঁইএক হামরাক এহেটাই মান।
জিআই রাখা ভাখি চারিক টান,
রহি জাতেক আজা পুরখাক মান।
জনম ভুঁই মাই ভুঁইএক টান,
জিআই রাখা জল, জঁগল, জমিক মান।
একাসি গুসটিক জড়ল নাতাক টান,
জিআই রাখা সমধিক মান॥

ধান ঝাড়া

আঘন মাসে ধান কাটি,
খেইএ ডিগাইঅ।
বিঁড়া গিলিন ঝাড়ল বাদে,
আগড়া রহি জাইক।
আগড়া গিলিন মাড়া ঘুরাই,
অখনিএ উটকিঅ।
পঁছড়ি পঁছড়ি আগড়া ধান,
পেছিআই সঁজাইঅ।
সঁজাই সঁজাই ডিনি গাদাই,
কুঁচড়িই বাঁধি রাখিঅ॥

নাউআ বেরা

ভুড়কা উগেই খুখড়া ডাকে, ভিনসার হেলে,
বিহানেক সিতলি বাসাতে, মনউআ হরসে।
রৌঁগিআ বরন বেরা, ফুল ঝাইর বিহানে,
পাহাড় কঁরে উগেই বেরা, পুব আকাসে,
সনাক লেখে আলা করেই বসমতাকে।

কলকলাই জাগত পাইখ পাখুড় ভিনসারে,
হেরিঅল ভুঞেক ঘাঁস ভিজেক সিসিরে,
পরকিতি সাজলনতি হেউএক আপনে,
চাসানিখা ডহরত খেতি বারিক কামে।
নাউআরা দিসা পাতত, নাউআ ডহরে।

মাড়অলি দেই বরন করিঅ সুরুজকে,
নাউআ বেরা বিতেক সুরুজেক সৈঁউরনে।

সিআর

হুককা হুআ চিলুম চুকা,
সিআর গগাই হুককা হুআ।
বাইদ বইহার লদিক লাধনা,
রহত অখরা গাঢ়া টঢ়াই।
ডুমইর পাকল জইড় পাকল,
খাত অখরা খাঁখটি গেঁড়র।

দেউতা ভুতাক দিসা

বার মাসে তের পরব,
রিষে রঁগে মাতি রহত,
তের দেউতা ভুতা
কন দিসাই কনে কাঁহা রহত ?
পুরুব দিসাই রাঁগা হাঁড়ি,
পছিম দিসাই রঁগ বুড়ি ।
উতর দিসাই বড় পাহাড়,
দখিন দিসাই জাহের বন।
উতর পুরুব কনাইঁ ডিনি গঁসাইঁ,
উতর পছিমে কেরিআ বাদইরা।
দখিন পছিম কনাইঁ বাঘুত কুদরা,
দখিন পুরুব কনাইঁ চেঁড়ি গঁসাইঁ।
বান সিঁঘেক করিঅ আরাধন,
পানি দেই জিআই জিঅন।
বসমতাক করাইঁ জনম মরন,
মাহামাইঁএক করেঁ মাহা মেলন।
আজা পুরখা বুঢ়াথান,
কুল পুরখাক করিঅ সৈঁউরন।
বিরহদ গাছে বড় বুড়িক থান,
ছুট ছুট গাছ ছুট বুড়ি থান।

বরিসাঁই দেলেইক দাগা

আসাড় সরাবনে নেহিভেলি দেখা,
বরিসা তঁই কাহে দেলে এসন দাগা।
চাতকিকরাক আসা বরিসাক বুঁদা,
চাসানিখাক মনে বেড়ি জে জালা ॥

আসমানে জে মেঘেক আনাগনা,
চাঁদ সুরুজেক লুকলুকানি খেলা,
হিআকর মাঝারে বিজলি চমকলা,
কাহে করিহা তরহা এতেক ছলনা ॥

আসাডিআ গাহি গাহি চাস করা,
ধাঁগড় ধাঁগড়িরাক জে রিঝে মাতা,
ই বছরে বরিসাঁই দেলেক দাগা,
ভাদরে বুমাই ভাদরিআইঁ মাতলা ॥

চাস নি হেলে ভাত মাড়েক জালা,
ভুখ পিআসে ভরতেইক নি টঁটা,
থানাই থানাই উপর বাটে ভালা,
আসাই আসাই মরত চাসানিখা ॥

পেছুই ঘুরা

খলি খুকড়া লেই জাখরা পেছুই ঘুরত,
লাজ সরম খাইবসি আনখাই গহলত।
হাঁড়িক হাঁড়িক করি খেদড়ানি খাতত,
লই লই করি হাঁকাউলে ঘুরি আউঅত।
লিলকাই দেলে বিন তালেই দমে ভুকত,
আপনটা অখরা চিনহেলাই নি পারত।
পরেক গহড়ানি খাই জিঅন বিতাঅত,
আপন বুইধ ভসসাঁই চলেলাই নি খজত।
পরেক ভসসাঁই চলি বিকলাই বুলত,
আইধারা কুকুর রাসতাই আনখাই ভুকত।
কনে আপন কনে পর উটাউ নি জানত,
পরকে আপন ভাভি অখরাক গড়ে গিরত।
কনটা হেঁট কনটা উপর ভাভে নি জানত,
টমড়ি টমড়ি সইহরন ভুঁই খজি বুলত।
তিন ঠেঁগ হেলে জনদিন হেতেইন চেতন,
বুঝতা উদিন বেগাঁতে গেলে এহেটাই রতন।
এখনু এহে নিঅর ঢেইর গিলি ঢনকি বুলত॥

ঝাড়খনডেক দেউতা

দলমা পাহাড় করেঁ সাল মছলে ঘেরা,
খড়কাই সবননাখাক মেলন জাহাঁ।
সনারিহঁ আইকে দিঅ লদি দুমুইহা,
সভি আহেইক মাইঁভুঁইএক ডিঁডিআ।
উলিআন গাঁউএ এক বিরেক গাঁথা,
নিরমল মাহাত নাম জগবনধুক পুতা,
পাহাড় চাঁড়ি সভি জেসন উগল বেরাঁ।

পুরথারাক মুহে সূনেই হকেক কাথা,
আদিবাসি ঝাড় খনডিকরাকর দসা।
বাহারিআরা লুটহত বাপইতা জাইগা,
বসাগত জমি দখলাই কল কারখানা।
আদি বইসকতারা হেঅহত ঘারছাড়া,
উঠতি উমইরেই নিরমল খালাক কিরা,
জল জঁগল জমিক হকে পান সঁপলা।

ধানবাইদ মারাফরি বঁকারঅ হাটিআ,
ঝাইরা রাউলকেলা টাটাক কারখানা,
জঁদে থানাউবেহে চিমনিকর ধুঁগআ।
মাফিআ গুনডারা লুটহত কড়ি টাকা,
আদিবাসিকর জমিহঁ কারখানা গঢ়লা।
কমপানিক কামে বাহারিহঁ ভরাউলা,
হঁকিকে নিরমল মাহাত সিহরি ডাঁঢ়ালা।

বালিডি রসুনচপা হেঁসড়া বাঘলতা,
নিরমল মাহাতই হাঁকাউলাক সভা।
রুখা পাথইরা মাটিই পানিক জালা,
আউআ সভে গাঁইত কদাইর ধরা,
বালিডি ডুংরিক মাজে বাঁধ কড়া।
চাইরঅ গাঁউএক মিটলেক জালা,
বারমাস চাস করত নিজজাললা।

৪ আগসট নিরমল মাহাত সহিদ হেলা,
ঝাড়খনডেক পাহাড়করেঁ ডুবলেক বেরাঁ।
দেসদুনিআইঁ ছপলি গেলেইক বানারিআ,
ঝাড়খনডেক উগল বেরাঁ,নিভি আঁধরিআ!
ডাবকে ডাব উজাই মানুস টাটাইঁ জহড়লা।
আইঁখেক লরেঁ লহ লহ মালা পিঁধাউলা,
হে, মাহান বির গড় লাগইঁ ঝাড়খনড মসিহা॥

সহিদ সেউরনে

নমঅ নমঅ মাই মাটি, জনম হামর রাঢ় মাটি,
চুআড়েক সিরমনি, বির রঘুনাথ আর বুলি,
জল জঁগল জমিক লাগি, করলাহাত হুমদুমি হে।
এহে জনম ভুইঁএক লাগি, আপন জিবন সাঁপি লেলা গউ,
মাই ভুইঁএক লাগি।

সাঁউতাল হলে বিরসা মাঝি, সিধু কানহু চানকুক টাঁগি,
বিরটিসেক খাজনা জারি, ভাগনা ডিহে সভা করি,
বাপইতা জমিক লাগি, পান সঁপলা ফাঁসিঁই চটি হে।
এহে জনম ভুইঁএক লাগি, আপন জিবন সাঁপি লেলা গউ,
মাই ভুইঁএক লাগি।

ভারত ছাড়া হুমদুমি, চুনারাম গবিনদঅ লাটি,
বিরটিসরাকর থানা ঘেরি, দেলখিক সভে ভাঁগিচুরি,
ভাবনি মহিনি বির নারি, ভারত সাধিন করেক লাগি হে।
এহে জনম ভুইঁএক লাগি, আপন জিবন সাঁপি লেলা গউ,
মাই ভুইঁএক লাগি।

আইন অমাইনঅ হুমদুমি, বিরটিসরা চালাউলা গুলি,
সিতল মহন খালা গুলি, আর গকুল গনেস সহদেব চাসি,
পাঁচ সহিদে দেলেইন বলি, ভারত মাইএক সেবা করি হে।
এহে জনম ভুইঁএক লাগি, আপন জিবন সাঁপি লেলা গউ,
মাই ভুইঁএক লাগি।

সহিদ নিরমল মাহাত

ঝাড়খনেক মাটিই জনম রহে,
সিঁগ ভুঁইএক উলিআন গাঁউএ।
মাই ভুঁইকে বাঁচাউএক তেঁহে,
আগদহলি হেই আগুআই রহে।
ঝাড়খন রাইজকে গঢ়েক তেঁহে,
লহ দেইকে হক উসুল কররহে।
মাই মাটি সনাক জনম ভুঁইএ,
নিরমল মাহাতঅ হিআক মাঝে,
ইতিহাসেক পাতেঁ আমরি রহে।
নমঅ নমঅ গউ তহর গড় তরে॥

সহিদ রঘুনাথ মাহাত

রঘুনাথে কহেই খলি,
দেসেক তেঁহে দেবেইঁ বলি, মাইঁ গউ মাইঁ।
আসিস হামকে করে গউ তইঁ মাইঁ,
এঁরেজরাকে হামর দেসলে দেবেন তাড়াই।

ঘুঁটিআডি গাঁউএ ধাম,
রঘুনাথ মাহাত নাম গউ।
আপন মুলুক আপন রাইজ, দেইহন গউ জানাই।
হামরাক দেসলে খেদি দেবেইন,
এঁরেজেবর রাইজ।

হে সেনানি

হে ভারতেক মাহান বির জইধা সেনানি,
জখরানি লহু দেই করলাহাত দেস সাধিন।
তহরা দুসমনেক ছতিআই বিঁধলেহে তির,
তেঁই আইজ বাঁচি আইহঅ হামরা নিফিকির।
হামরা আইজ তহরাক পাসে আইহঅ চিরঅ রিনি,
১৫ আগসট সেউরনে হামরাক হাঁঠুগাড়ি গড়লাগি॥

মানব নি বাহারি ভাখি

ঝাড়খনেক সনাক মাটি,
আহেইক খনি পরিপাটি।
আপন জমি, আপন মাটি,
এহেটাই হেকি জনম ঘাটি।

ঝাড়খনেক আদি ভাখি,
জিআই রাখা মাই ভাখি।
মাঞেক ভাখিই রাউ কাটি,
মানঅব নি বাহারি ভাখি।

~ বুমেইর ~

মাইঁ ভাখি

মাইঁ ভাখি কুড়মালি, হামরাক ভাখি হেকি,
আদি ভাখি কুড়মালি, কতেক সুথর হেকি,
অগউ জনমেকর ভাখি।
অগউ কুড়মালি ভাখি।

রাঢ় ভুঁইএ রাউ কাটি, রাখা আপন ভাখি,
মাইঁএক দুধাক লেখেন ভাখি, হামর মাইঁ ভাখি,
অগউ জনমেকর ভাখি।
অগউ কুড়মালি ভাখি।

রিঝে রঁগে বুমেইর গাহি, নিজেক মাইঁ ভাখি,
মধুক লেখেন মাইঁএক ভাখি, দেখা থখি কুটি,
অগউ জনমেকর ভাখি।
অগউ কুড়মালি ভাখি।

কুড়মালি কহি কহি, কউহা আপন ভাখি,
পরদিপেজে কহেই হাঁকি, রহি জাতি ভাখি,
অগউ জনমেকর ভাখি।
অগউ কুড়মালি ভাখি॥

আসে রহলঁ

নিরনে ধরনে ধনি, হামর তকেই মনে পড়েই লউ । (রং)

ঘুরি ফেরি, অহ্ ঘুরি ফেরি।

হামে কেইসে বিতাম গউ তকে ছাড়ি,

তঁই হামর হিআই গাঁথল, মনেক মল্ল ফুলা গউ,

ছাড়ি গেলে কাঁহা পাউঅব, মল্লেকর সুধা গউ।

আকনদ্ ফুলাক মালা গাঁথি, রাখলিঅ মঞ জতনে গউ,

সাঁচি সাঁচি বিতি গেলি, বছরি বছরি গউ।

আঁকই বাঁকই বহই লদি, কাঁহা জে ঠহরতি গউ,

ধনি আউবে কহি ভালি আইহ, তহরি ডহর।

পরদিপ ভনেই ভাভেই মনে, জড়ল্ নি পিরিত গউ,

হামর পাঁজরঅ কাঁঝর গউ, ভাভি ভাভি॥

পহিল পিরিতি

পহিল পিরিতি, ভুলে নি পারতি,
ধিকি ধিকি গউ, সুতি সুতি গউ,
মনে পড়েই গউ,
পহিল পাতা পাতি।

জড়ল পিরিতি, গঢ়ল পিরিতি,
বিতি বিতি গউ, জিনগানি গউ,
কাঁখনাহিঁ গউ,
হামর লিখল নিঅতি।

আসে আসে রহল, মধু মাস পড়ল,
ছামড়াহিঁ গউ, জড়ি জড়ি গউ,
গঢ়লিঅ গউ,
দিঅ জড়ল হিআ।

পরদিপেকর ছতি, জাতেক নি ফাটি,
আউতি আউতি গউ, জাউতি নি গউ,
রহতি গউ,
হামর হিআইঁ গাঁথল।

চাঁদেক লেখে

মনউআই রহলি ধনি, গঢ়বই দিঅ জিনগানি গউ ,
ফাঁকি দেইকে ফেঁকি দেলে, হামর কুঁঅর জইবন।
মনে পড়েই জে সতেখন, ঘনে ঘনে মুহেক হাঁসি চাঁদেক বরন॥ রং
চাঁদেক লেখেন মুহেক হাঁসি, ধব ধব জেসন ইজতিআক রাতি।
ভাদরেকর গটে রাতি সখি, করম নাচে আউতি ।
মনে পড়েই জে সতেখন, ঘনে ঘনে মুহেক হাঁসি চাঁদেক বরন॥ রং
ভমরা মধুক আসে, বসেই দেখা লহকইআ ফুলে গউ,
পিআ হামর কেথিক আসে, রহলি জে পর বাসে গউ।
মনে পড়েই জে সতেখন, ঘনে ঘনে মুহেক হাঁসি চাঁদেক বরন॥ রং
পরদিপ ভভেই মানে মানে, আর বিঁধলি পিরিতিক বানে গউ।
সানে মানে গুনেমানে বানার, সখি তঁহি জে পরান।
মনে পড়েই জে সতেখন, ঘনে ঘনে মুহেক হাঁসি চাঁদেক বরন॥ রং

মাই ভুঁইএক তেঁহে

রাঢ় ভুঁইএ জনম হামর, রাঢ় ভুঁইএ মরন,
বজজড় ভুঁইএক মাটি জেসন সনাক বরন।
অ, মাই জনম দেলে গউ,
জনম দেলে গউ মাই এহে ঝাড়খনেক করাই। (রং)
এহে মাটিই জনম লেলা, কুড়মি কড়া কল,
খেতি বারিক অখরাই লাগত, আদিকেরি অড়া।
সাল পিআল মছল বনে, ঘেইরল চাইর বাট,
লতে পাতে বুড়ে ঝাঁপে, হেরিহল সভে বাটা।
কাঁসাই সিলাই সবননখা, গুআই, দামুদর,
কুলকুলাই বহই লদি, মাই ভুঁইএক উপর।
সমেত সিখর পরেসনাথ, আর আহেক অঝেইধাক নাম,
অহে গজাবুরু আহেক দেখা, মানভুঁইএক টুঁই।
জাউআ টুসু ছউ কুমইরে মাতি রাঢ়ভুঁই,
মিলিমিসি রিকামাঠাই, রহেই মাই ভুঁই।
রিত, নিত, বাঁদনা, করম, সারনাক এহেটাই ধরম।
গাউআ সভে মিলি মিসি করমেই ধরম।
পরদিপ ভনেই রাঢ় কাথা, জিনগানিক গাঁথা,
জইঅ জইঅ গাউহা সভে, মাই ভুঁইএক কাথা।

সখিআ বিনে

সখি কাঁহা জে রহলি, মধু মাস পড়লি,
রহল মঁই বসি, তকে ভালি ভালি,
মনউআ ডাকই ঘনে ঘনে রে।
সখিআ বিনে, হিআ হামর টানে,
সাঁঝ বিহান সতিখনে রে।
রৌগিআ জে মাটি, রাঢ়ভুঁইএক মাটি,
দেখা পারাস ফুলেক পরিপাটি রে।
খঁপাই গুঁজবউ মালা, দেবউ হালা হালা,
গাঁথবই হামে, বিনি সুতাক মালা,
বধাব জে মালা পিঁধাই রে,
বঁধুআকর মালা, ফুলেকের হালা,
পিরিতিকর ডালা রে।
রৌগিআ জে মাটি, রাঢ়ভুঁইএক মাটি,
দেখা পারাস ফুলেক পরিপাটি রে।
কাঁসাই সিলাই লদি, সবননখাক চাঁদি,
কেরিআ বরন দামুদরেক পানি,
দেখা জেসন আইখেক কাজর রে।
হিআকর মাঝারে, গাঁথলি পরানে,
বিঁধলি পিরিতিক বানে রে।
রৌগিআ জে মাটি, রাঢ়ভুঁইএক মাটি,
দেখা পারাস ফুলেক পরিপাটি রে।
ককিলা জে ডাকই, পিআ জে আউঅই,
পরদিপে কহই পিআ নি ভুলই,
কাঁখনাহি জড়বই পিরিতি রে।
বসমতিহঁ লিখল, নিঅতি হামর, 7
জিনগানি দেবেহঁ বিতাই রে।
রৌগিআ জে মাটি, রাঢ়ভুঁইএক মাটি,
দেখা পারাস ফুলেক পরিপাটি রে॥

অজধিআ পাহাড়ে

কতেক সুখর অজধিআ,
জেসন রূপ ঝলকই বসমতা, গউ।

মন হামর ডাকেই সতিখনে,
অ গউ পান ভঁমরা, হিআ হামর অজধিআক বনে।

সাল পিআল আর পলাস বনে,
আর ভঁমর বসেই ফুলাক বাসে, গউ।

মহুল ফুলাইঁ বিঁধলি পরানে,
অ গউ পান ভঁমরা, হিআ হামর অজধিআক বনে।

কুইলি ডাকেই গাছেক ডাইরে,
পিআ কে জে মর পড়েই মনে, গউ।

মেজুরিআ লাচেই কন বনে,
অ গউ পান ভঁমরা, হিআ হামর অজধিআক বনে।

আর রুখা মাটিক বাঁসিক সুরে,
অ গউ মন হামর মাতেই ঝুমইরে, গউ।

পরদিপ ভনেই ঝুমইরেকর টানে,
অ গউ পান ভঁমরা, হিআ হামর অজধিআক বনে॥

কাহে এসন হেলে

কতেক দিনেক ভালবাসা, রাখলঁ জতনে,
নি জানঁ কাহে এসন দেলে মকে দাগা,
বঁধু, কাহে এসন হেলে।

ফুলে জেসন কঁটি লেলে, বসত গউ ভঁমরা,
মধু লুটা হেলে বাদে, দসর ফুলাইঁ মজত,
বঁধু, কাহে এসন হেলে।

পিআ হামর পর দেসে, মজলি কন ভেঁসে,
গুমরি গুমরি হামে, রহলঁ তর আসে,
বঁধু, কাহে এসন হেলে।

সাল পিআল মছল বনে, ডাকঁ ঘনে ঘনে,
পরদিপ ভনে মধু মাসে, পিআ রহলঁ তর আসে,
বঁধু, কাহে এসন হেলে।

পানি জিআউ জিউ জিআউ

আসাড সরাবনে নেহি ভেলি দেখা,
বরিসাক পানি চাতকের আসা!
চাসানিখা রহেই আসাই রে,
গাছ কাটি কাটি, দেলখিক উজাড় কেরি,
খরাই মরি জাহাত চাসি রে।
গাছ লাগাউআ, জিউ জিআউআ,
হেরিহল হেতেক গটে ভুঁই রে।
মরন ধরন পানি, কাকরউ নি জানল,
সতরে বতর, সভেকের জানল।
অগুআহি সতর হেউআ রে,
পানি জিউআআ, জিউ জিআউআ,
জিআই জাতেক মাঁই ভুঁই রে।
গাছ লাগাউআ, জিউ জিআউআ,
হেরিহল হেতেক গটে ভুঁই রে।
চাসা নিখাক জালা, চাসা নিখাক হালা,
এক ডুভা মাড়ে, মিটেক জে আসা,
পেটেক জালা, বড়ি জালা হে।
গরিবে জে জিআই, উমিরে জে সিরাই,
কহেই পরদিপ আউআ সভে জিআব হউ।
গাছ লাগাউআ, জিউ জিআউআ,
হেরিহল হেতেক গটে ভুঁই রে।

বসমতি

ধনে ধানে গউ, রাঢ় ভুঁইএক মাটি,
এহে মাটি সভেকলে জে আদি। রঁ

সাল পিআল টেস ফুলাইঁ, আমা জামা কইর মহুআইঁ গউ,
ফুলে ফরে আহেক পরিপাটি।

এসন সুথর জনম ঘাঁটি, রূপ ঝলকই বসমতিক গউ,
তঁহি মাইঁ গউ কতেকেনা খাঁটি।

গিত গাহি ঝুমইর হাঁকি, রিঝা মাঠাইঁ আখড়াহি গউ,
রিঝে রঁগে উদকি উঠেই ছতি।

সুখে দুখেক জিনগানি, আর মধু মাসে বছর গনি গউ,
কুইলি কুহন কুহ কুহ ডাকি।

গড় লাগঁ মাইঁ মাটি, ছটনাগপুরেক সনাক কাঠি গউ,
পরদিপ কহেই হামরাক জনম ঘাঁটি॥

টুসু হামর সনাক কাঠি

সিসু কালে মনে পড়েই টুসু,
মাইঁএকর আঁচর টানা।
মনে হামর পড়েই মাইঁ গউ ,
সসুর ঘার জাইএক বেরা।
মাইঁএক গড়েক ধুরা,
বেটি জনম, পরেক ঘার আলা করা।

হামর টুসু সনাক কাঠি গউ,
জঁগল মহলেক মাটিইঁ।
মাইঁ মাটিইঁ, জনম ঘাঁটিইঁ,
বেটিরাই হেলেন খাঁটি।
অগউ বসমতি,
তঁহি মাইঁ গউ সভেকের লাগিস মতি।

বছরি সিরানেক দিনে টুসু,
আউআ গউ সিনাই লিহা।
সাঁগি জড়ি সভে মিলি ,
মকর সিনাই লিহা।
টুসু জাইহা কাঁহা,
জাউএক বেরি কাঁদাই কাঁদাই নি জাইহা॥

টুসু চুমান

টুসু হামরাক ছটনাগপুরেক,
হামরাক টুসু বেড়ি আদরেক।

টুসু হামরা থাপনা কেরিঅ, আঘন সাঁকরাইত দিনে,
টুসু মাইঁকে মুড়ে কেরি, ঘার আনিঅ হাঁসি মনে।

তিরিস দিনাই তিরিসটা ফুলাইঁ,
টুসুক দেবেক হামরা গড় তরাইঁ।

সবরনখা দামুদরে, কাঁসাই সিলাইয়েক তিরে,
সভে মিলি মনের সুখে, গাহব গিত টুসুক তেঁহে।

বিহান হেলেই সভে সাঁগি মিলি,
সঁগে জাই টুসু হেলি ডলি।

তিলেক পিঠা বেড়ি মিঠা, পুস মাসেক মকর দিনে,
লউতন লুগা পিঁখিঅ হামরা, মকর্ সিনাই লেইএ।

চাল টুসু চাল সভে সাঁগি মিলি,
খেলা করঅব গউ লদিক পানিইঁ।

পানিক ছলে চলি গেলে, পরান হামর কাঁদাউলে,
পরদিপ কেহেই মিলন-হেলে, জানিঅ সসুর ঘার গেলে।

টুসু হামর আদরেক বেটি

টুসু হামর আদরেক বেটি,
অগঅ সনাকলেজে ঢেইর খাঁটি।

হামর টুসুক পরিপাটি, রাখম নি কনহঅ তুটি,
জে টুকু মুরাদ আহি উ টুকুই বেটির আহি,

বেটি হামর সুখেই জে রহে,
বেটি মান করে নি হামর পাসে।

টুসু হামর বেটি কহি, কটু কাথা নি কহি।
বেটির কদর বেটির আদর, করতঁ বেটিহঁ সমাদর।

বাপের কদর বেটিএই জানেই,
বেটি নি রহেই অঁই কিনা জানেই।

পরের ঘারকে গেলেউ টুসু, মাই বাপকে নি ভুলেই,
সুখে দুখে মনেক কাথা, মাই বাপকে নি কহেই।

টুসু হামর ঘার আলা করেই,
জেসন পরদিপেক আলা জরেই॥

খুখড়া ডাকাই

ভুড়কা উঠাই খুখড়া বাঁপট মারেই পঁখড়া,
এ গউ গুঁড়ি কুটে,
হামর উঠা সাধেক দেউরা গুঁড়ি কুটে।

দেউরা হউ দেউরা, আর সুতিআ নি রইহা,
আরুআ চারেক গুঁড়ি কুঠি, করব গুঁড়েক পিঠা।

বাইদ বইহার কানালি, রপা মাসটাই রপলি,
কাটন মাসে ধান কাটি, ঘার হামে ভরলি।

খাপরা পিঠা গুঁড়েক পিঠা, পরদিপ কহেই বড়ি মিঠা,
ভিনসারিই, হামে ছাঁকব হউ গটা গটা, মকর সিনাই।

বার মাইসা পিরিতি

বার মাসে তের পরব, ছটনাগপুরেক এহেটাই গরব,
রিঝে রঁগে মাতি সারা বছর।
বাঁদনা টুসু করম গাঁজন, রজসলা জাঁতাল পালন,
আখাইন জাতরা, ছাতা আর সিঝান,
আর বিহন বিজ রাখে ক তেঁহে, রইহনে বিচ বিহিন বুনিএ ,
জিতা জিহুড় আর মহকউআ সারহুল।
কাঁসাই সিলাই ইজরি গুতাই, দামুদর আর সুবরনখাই,
কুমারি বহই কুলকুলাই।
বন পাহাড়ে ক ডুঁগরি করেঁ, ডি ডাহাল গাঁউ বসাগতে,
চাইর বাটে কতি রূপ ঝরে।
কতি পাহাড় কতি লদি, রুখা পাথইরা মাটি,
এইটাই হেকি হামরাক জনম ঘাঁটি।

অজে অৰাধিআক বন পাহাড়ে হামর টানেই গঅ অনতর,
আউআ বঁধু হামর দেসে, অগঅ পান ভমর।
এসন সুনদর ভুমি, সাঁউতাল মুনডা কল কুড়মি,
এহে ভুঁইএক হেকা আদিবাসি,
সাল মহ্ল কেনদ পিআল, আর আহেক আম কাঁঠাল,
চাইর বাটে হেরিহলেক বাহার।
খেতে গঠে কাম করি, রিঝে রঁগে মাতি রহি,
তেঁই হামরা ঝুমইর হাঁকি।
এহে ভুইটাই আদি জান, আজা পুরখাক সঁইতল ধন,
জনম হামর এহে রাঢ় ভুঁইএ।
অজে এতি দিনাক ভালবাসা বঁধু, হিআ মর টানে,
পহিল পিরিতির ডালা, অগ রহা অনতরে।
সুখে দুখে ভালবাসি, তেঁই হামরা খাটিলুটি,
মিলি মিসি রহঁ একেসঁগে,
ভি ভাহাল ডুঁগরি ঘেঁসে, গাঁউএক সভা গাজাড় ঘেঁসে,
পাহাড় করেঁ সূরুজ জে হাঁসে।
মধু মাসে তহর আসে, বসি রহঁ নিরলে,
আউআ অগউ পান ভমরা, মহ্ল বাগানে॥

সাত সহিদ

হামর মাটিক হউ, হামর দেসেক হউ,
মাইঁ ভুইঁএক রাখলাহাত মান।
ভারত সাধিন করেক তেঁহে, 1930 সনে,
অসহজগ উলগুলানে।

গনেস মহন আর গকুল,
সহদেব আর সঁগে সিতল।
জিউ দেইকে রাখলাহাত মান,

ভারত ছাড়া উলগুলানে, 1942 সনে,
গবিন্দ চুনারামেক সান।
ভাঁগলেখিক এঁগরেজেক মুসিআন।

সহিদেক মাটি

রাঢ় ভুইঁএক লাল মাটি, বির সহিদ রঘুনাথেক মাটি হে,
সনাক লেখে খাঁটি জ এহে মাটি হে।
বাপইতা জমি লুটেক লাগি, বিরটিসরাকর খাজনা জারি,
অ তাই বাঁহি বলে রুখে কুড়মিক বেটাই হে,
মাইঁ ভুইঁকে জহার জানাই।

জল জঁগল জমিক লঢ়াই, কুড়মি ভুমিজ সভেক লঢ়াই হে,
মাইঁ ভুইঁএক মান রাখেক লঢ়াই হে।
পাতকুম আর ধলভুম, আর মানভুমলে বরহাভুম,
সিখর ভুইঁএ দেলেইঁ জে সাড়াই হে,
মাইঁ ভুইঁকে জহার জানাই।

আপন মুলুক আপন রাজ, ধুর খেদা বিরটিস রাজ,
রঘুনাথ মাহাতক এহে কথা হে।
পরদিপ কহেই সৈঁউরন করঁ, চুআড় মাহা নাইঅক অগঅ,
অ তাই গড় লাগঁ, তহরি সৈঁউরনে হে,
মাইঁ ভুইঁকে জহার জানাই।

উলগুলান

রাঢ় ভুঁইএক মাটি,
চানকু মাহাতক টাঁগি।
টাঁগি সানাই সানাই গউ,
টাঁগি ঘুরাই ঘুরাই গউ।
ঘুরাই ঘুরাই গউ,
দেলেক মুড়টাই পাঁগি।

সাঁউতাল উলগুলানে
পহিল ফাঁসিহি চঢ়লে,
হাঁসি হাঁসি গউ,
সাঁপি দেলেন গউ,
সাঁপি দেলেন গউ,
আপন জিনগানি।

হামরাক ঝাড়খন

সুনা সুনা ঝাড়খন সরকার,
লাগু করা 1932 এক খাতিআন,
আর নি মানব জে তেরিআন।
আপন জমি আপন দানা,
মানব নি আর মানা, ছিনগাই আনব হামরাক আপন হক।
ঝাড়খনেক আদিবাসি কুড়মি কড়া কল
সাঁউতাল আর ভুমিজ,
মুনডা খেড়িহা সবর অরাঁউ আর আহাত লউধা।
আপন ভাখি আপন চারি,
আদিকাললে বসাগত করি,
আজা পুরখাক সোঁউতল এহে জমি।
এহে মাটিই খাটি লুটি,
রিঝে রুঁগে ঝুমইর হাঁকি, কতেক সুথর হেকি জনম ঘাঁটি।
ঝাড়খনেক আদিবাসি, হামরা হেকিঅ ঝাড়খনডি,
বার মাসে তের পরবে হামরা রইহঅ গউ মাতি।
ঝাড়খন রাইজ গঢ়েক তেঁহে,
বিনঅদ বাবু আগুআই রহে,
লঢ়াই করি লেলা ঝাড়খন রাইজ।
সিধু কানহু বিরসা মুনডা,
বির রঘুনাথ বির তিলকা, লঢ়াই লাগি করলাহাত দেস সাধিনা।
আজা পুরখাক ডহর থানাই নাউআ গঢ়ব হে ঝাড়খন,
আগুআই আউআ সভে মিলি করব উলগুলান।

রিবো রঁগে মানভুম

রিবো রঁগে মানভুম, ছ নাচে গেদদাগুড়ুম হে,
মানভমেক এহেটাই সনমান হে।
ছ কুমইরে মাটিক সুরে, সভেকেরে মুহেই ঝরেক,
অ জে ধরাধামে মানভুমেক অবদান হে,
গাহব হামরা মানভুমেক জই গান হে।

সাল মছল পলাস ঘেরা, কাঁসাই সিলাই কতেক লদি লালা,
মালভুমি পাহাডেক বেড়া হে।
উততরে তে সিখরভুম, দকখিনেজে বরহাভুম,
অহ জে জে পুরুবেতে আহেক মললঅভুম হে,
গাহব হামরা মানভুমেক জই গান হে।

পরদিপ কহেই কঠিন মাটি, মানভুমেক রুখা মাটি,
সনাক লেখে খাঁটি জে, এহে মাটি হে।
এহে মাটিইঁ খাটি লুটি, তাউ হামরা কুমইরে মাতি,
ধইন ভুমিক পুইন জে, এহে মাটি হে,
গাহব হামরা মানভুমেক জই গান হে॥

করনা ভাইরাস

চিন দেসে সুরু হেলেক, দেস দুনিআই ছিরিআই গেলেক,
গটে পিরখিমিটা করনা ভাইরাসে।
হামরাক দেসে উমিররা উড়াগাড়িই লেই আনলা,
আর মানলা নিহি কাকরউ কনহ মানা।
লেই আইকে ঘুরি বুললা, সপিংগ মল আর পাটিই ঘুরলা,
ঘেসাই ঘেসাই ঘুরলা লকেক সঁগ।
ছুআতি রগ সভে জানত, মানলা নি কনহ বিপদ আপদ,
এসনে করি ছপলি গেলেক ভারত।
অ ভাই ভাইরাসেকলে বাঁচেক তেঁহে, সভে রহা হউ সতর,
এখন ঘার ভিতরে সভে রহা,
আর বাহিরাহানা ডহর।
সাবুন লেইকে হাঁথ ধউআ, বাহার বাহারালে মাকস পিঁধা,
ঘুরি বুলিহা না আনখাই হিঁআ হুঁআ।
ফারাক ফারাক সভে রহা,
কাকরউ পাসে নি হিবড়া।
মিরা মনতিরিক কাথা টুএক সুন।
অ ভাই মনদির মসজিত গিরজা এখন নি জে বাঁচাতন,
ডাকতার আর নারসগিলিন তহরাক জিউ জে দেতহন।
গরিবেকর বেড়ি জালা, চাস বাস আর সুসার করা,
তাউ দিনে জুটেন এক ডুভা মাড়।
জতেকেই ধরেন পেটেক টান, তাউ নিহি নিমক খাত,
দেসেক লাগি জমি চাস করত।
পরদিপ কহেই ডুভা মাড়ে, হামরাক কাটেই জে জিবন,
অ ভাই নিজেক লাগি, দেসেক লাগি তহরা করহা লক ডাউন।

জাগরন

আইজ গটা রাইত টুসুক জাগরন,
হামরা করম গঅ টুসুক বরন।

সভে মিলি টুসু ধনকে করম গঅ কতি জতন,
সাঁগি জড়ি সভে মিলি, টুসু ধনেক গিত সৈঁউরন।

আইজ গটা রাইত টুসুক জাগরন,
হামরা করব গঅ টুসুক বরন।

আঁখি লরে ঝরঅ ঝরঅ, হিআ গঅ করেই রদন,
বিহান হেলেই পানিই টুসুক, হেতেক জে সুবেক মেলন।

সাধেক জঁগল মহল

সাধেক হামরাক জঁগলমহল, কতিনা সুন্দর গউ, দেখি লিহা,
বঁধু রূপে ঝলমল গউ, দেখি লিহা॥ রং

সুখে দুখে ভালবাসা, রুগড়ি মাটিঁহি গউ,
বাঁদনা টুসু করম ঝুমইর ছঅ নাচে মাতঁ গউ।

কাঁসাই সিলাই ইজরি গুআই, দামুদর সুবননখাই,
ঝিরিহিরি বহঅই জে লদি, বাগালাই বাজাউএই বাঁসি।

পাহাড়ে গাজাড়ে ভততি, সাল মল্লেক বনে হে,
আউআ বঁধু হামর দেসে, পরদিপ আসে বসি হে ॥

পহিল দেখা

অগউ ঝাড়খনেক বনে ঝাড়ে, সাল মহ্লেব বন,
আউবে কহি, আউলে নেহি, হামে কিনা করব এখন।
তহর মনে কিনা পড়উ নেহি, কেঁদুঝারে পহিল দেখা হেলি জখন।
কেঁদ পাকল পিআল পাকল, অগউ সারি সারি বন,
মধুক আসে ভমরা পাগল, জেসন কুইলি ডাকেই সতিখন।
তহর মনে কিনা পড়উ নেহি, কেঁদুঝারে পহিল দেখা হেলি জখন।
অগউ বার মাসে তের পরব, জেসন বাঁদনা আর করম,
আর মধু মাসে বছর গনন, পিআ করবউ গউ বরন।
তহর মনে কিনা পড়উ নেহি, কেঁদুঝারে পহিল দেখা হেলি জখন।
পরদিপে জে ভাভেই মনে, পিআ আউতি জে কখন,
গাঁথি হামে ফুলাক মালা, অগউ রাখবই জতন।
তহর মনে কিনা পড়ই নেহি, কেঁদুঝারে পহিল দেখা হেলি জখন॥

সবুর নি মানে

বছর ঘুরি আউলেক ফাগুন মাস
ভালি ভালি গেলি বার মাস,
বছর ঘুরি আইলেক ফাগুন মাস।
মনে রং লাগলি, গাঁথলি নইঅন বানে,
মন হামর সবুর নি মানে।
ভরা ফাগুনে হে বঁধু,
দেখা হেতি হে তহর সঁগে।
ডারে ডারে সাল মছলেক বনে,
কুইলি কুহন ডাকেই সতিখনে।
কুড়িচি ফুল ফুটলঅ,
ভমর বইসলি জতনে,
মন হামর সবুর নি মানে।
ভরা ফাগুনে হে বঁধু,
দেখা হেতি হে তহর সঁগে।
সাঁঝ বিহানে, পিঁদাডেক করে,
বসি বসি, ভাভ নিরলৈ।
পিআ পাসে আইএ,
তইঁ রহিস না মকে বিসরে,
মন হামর সবুর নি মানে।
ভরা ফাগুনে হে বঁধু,
দেখা হেতি হে তহর সঁগে।

ছটনাগপুরেক ধিআমনি

ছটনাগপুরেক ধিআমনি গউ,
অঝইদা পাহাড় আহেইক।
পাহাড়ে গাজাড়ে ভরি,
সাল মহলেক গাছ আহেইক।
তাহি রুপে ঝরেক, (রং)
সাঁউতাল মুনডা কল কুড়মিরা বাস করত।

বামনি ঝরেক ঝরনা পানিই গউ,
টুসু হামর খেইল করেই।
টুরগাতে গাছ কাটল দেখি,
টুসুর মুড় ধরলাহেইক।
অ গাছ উজাড় করি, (রং)
বসমতিক রুপ জে গউ, হেরাই জাহেইক।

সভেক সেরা গজাবুরু গউ,
সবলে জে, উচুই আহেইক।
টুসু মাইএক মুটুক জেসন,
সুরুজের সভা পাউএক।
অ তাহি আলা করি, (রং)
সভেকে রাখলাহেইন গউ , আপন করি।

বাঘ ভালুক আর হরিন মইউর গউ,
পাহাড়ে ঠাই নি পাহত।
বনভুমির ধংসেক খেলাই
সভে কিছু হেরাই জাহেইক।
অ তাহি, ভিড়কি জাহাত, (রং)
পরদিপ কহেই, সভে কিছু উভড়ি জাহেইক॥

ঝুমুরিআক টানে

ঝুমুরিআ সুরে, বাঁসি বাজে কতি ধুরে,
কনে বাজাই বাঁসেক বাঁসি হে,
বাঁসিইঁ মন টানে, মর হিআ মাঝে, মন মজেইঁ ঝুমুরিআক সনে হে ।
বাঁসুরিআক সুরেক টানে, বিঁধলি মর পরানে হে।

রৌঁগিআ পারাসে, এহে মধুমাসে বিঁধলি পিরিতিক বানে হে।

বসেইঁ অলি ফুলেকর কলিইঁ হে।
বঁধুআ বিনে, রহঁ কেসনে, জেসন ফুল বিনে অলি আনমইনা হে ,
বাঁসুরিআক সুরেক টানে, বিঁধলি মর পরানে হে।

পরদিপে জে ভনেইঁ, সখি রহলে কাহে অলতে,
আউআ বাঁসুরিয়াক সনে হে,
কটি জে লেলে, ফুলে ফুলে, ধুরলে কিনা বাস মিলেক হে,
বাঁসুরিআক সুরেক টানে, বিঁধলি মর পরানে হে।

জনমভূমি

ছটনাগপুর মালভূমি এহেটাই হামরাক জনমভূমি,
ছউ বুমইরে জঁগলমহল মাতি হে মাতি হে,
ছটনাগপুরেক হামরাই আদিবাসি।

কঁগসাবতি সিলাবতি, গুআই দামুদরেক মাটি,
সবরনখা সনাকেরি ঘাঁটি হে ঘাঁটি হে,
ছটনাগপুরেক হামরাই আদিবাসি।

কল কুড়মি আদিবাসি, কড়া মুড়া কিরাত আদি,
হড় মিতান একে সঁসকিরিতি হে, সঁসকিরিতি হে।
ছটনাগপুরের হামরাই আদিবাসি।

মালভূমিক রাঁগা মাটি, সনাকলেখে হেকেক খাঁটি,
মাইঁভুইঁ কতেকেনা খাঁটি হে খাঁটি হে।
ছটনাগপুরেক হামরাই আদিবাসি।

সাল পলাস সাহার ঝাঁটি, পাহাড়ে গাজাড়ে ভততি,
পরদিপ কহেই মাটিক মানুস, বঠি হে বঠি হে।
ছটনাগপুরেক হামরাই আদিবাসি।



~ চিসঅইআক চিনহাপ ~

পরদিপ কুমার মাহাতভ

[এম. এ. বি.এড. (ইতিহাস),
এম. এ. (কুড়মালি আর এডুকেশন)]

বাপেক নাম - নিধিরাম মাহাত
মাইএক নাম - ভানুমতি মাহাত
জনম ভুঁই - গাঁউ ঝালমামড়া,
থানা- জইপুর, জেলা- পুরুইলা,
মবাইল নম্বর- 7001376969
চিসঅল পঁথি- “কুড়মালি ভাখি চারি
সাহিতেক অড়পুখান”



978-93-5980-689-1